

LE CORGNE

SEIGNEURS DE LAUNAY, DE LA NOË-HASLE, DE LA VILLE-MORHEN,
DE LA VILLE-GOURANTON, ETC...



D'azur au léopard d'or, et à deux fleurs de lys en cheff de mesme.

Extrait des registres de la Chambre établie par le Roy pour la refformation de la Noblesse en la province de Bretagne, par lettres patantes de sa Maiesté, du mois de Janvier 1668, veriffieez en Parlement¹ :

Entre le Procureur General du Roy, demendeur, d'une part.

Et Philipés le Corgne, escuyer, sieur de Launay, et y demeurant, paroisse de Marroué, evesché de Saint-Brieuc, ressort de Rennes, escuyer René le Corgne, sieur de la Noe-Haslé, Iullien le Corgne, escuyer, sieur dudit lieu, Gilles le Corgne, escuyer, sieur de la Ville-Morhen, et François-Claude le Corgne, escuyer, deffendeurs, demeurants audit lieu de la Noe-Haslé, en la parroisse de Coesmieux, evesché de Dol, ressort de Rennes².

Veü par ladite Chambre :

La declaration faite au Greffe d'icelle par lesdicts deffendeurs, de soustenir ladite qualité d'escuyer par eux et leurs predecesseurs prise, porter pour armes : *D'azur au lion leopardé d'or, et deux fleurs de lys en cheff de mesmes*, le 17^e octobre 1668, signee : le Clavier, greffier.

Induction desdicts le Corgne, deffendeurs, sur le seing dudit Philipés le Corgne et maître Allain de Cargree, leur procureur, fournye et signiffiee au Procureur General du Roy, par Frangeul, huissier, le 18^e febvrier 1669, par laquelle ils soustiennent estre nobles, issus d'antienne extraction noble, et comme tels debvoir estre, eux et leurs posterite nee et à nestre en loyal et legitime mariage

¹ *NdT* : Texte saisi par François du Fou pour Tudchentil.

² M. Denyau, rapporteur.

maintenus dans la qualite d'escuyer et dans tous les droitz, privileges et preminances attribues aux antiens et veritables nobles et cette province et qu'à cet effect ils seront employes au roole et cathologie d'iceux de la seneschaussee de Rennes.

Pour establir la justice desquelles conclusions articulent à faitz de genealogie qu'ils sont issus d'escuyer Philipes le Corgne et damoiselle Sebastienne Jollan, sieur et dame de la Noe-Haslé ; que ledit Philipes estoit fils de Gilles le Corgne, de son mariage avecq damoiselle Gilette de Queauguen, sieur et dame de Launay ; que ledit Gilles estoit fils de Jan le Corgne et Jacqueline de Lesmeleuc, sieur et dame de Launay ; que ledit Jan estoit issu du mariage de Rolland le Corgne et de Catherinne Poullain³ ; que ledit Rolland estoit fils de Jan le Corgne et de Tualle de Cargouet, lesquels se sont de tout temps comportes et gouvernes noblement et avantageusement, tant en leurs personnes que biens, pris les qualittes de nobles, escuyers et seigneurs, et porté les armes qu'ils ont cy devant declares, quy sont : *D'azur au lion léopardé d'or et deux fleurs de lys en cheff de mesme.*

Un extrait tiré de la Chambre des Comptes de Bretagne, dans lequel, lors de la refformation des nobles de l'evesché de Saint-Brieuc, fait en l'annee 1446, est marqué au rang desdits nobles, Jan le Corgne, soubz le raport de la parroisse de Maroué ; en autre refformation desdits nobles dudit evesché de Saint-Brieuc, de l'an 1460, soubz le rapport deladite parroisse est marqué au huitiesme rang desdits nobles, Jan le Corgne, et en autre refformation de 1476, faicte desdits nobles, soubz le rapport ladite parroisse de Maroué, Guillaume le Corgne, noble homme, et au bout est escrit *noble*, et plus bas est aussy escrit en marge : *Jan le Corgne, noble homme, demeure en sa tenue.*

Les autres actes et pieces mentionnes dans l'induction desdits le Corgne, deffendeurs.

Arrest rendu en ladite Chambre, sur lesdictes actes et induction, par lequel, avant faire droit sur l'instance, auroit ordonné que lesdicts le Corgne se retireroient à la Chambre des Comptes pour, en presance du Procureur General du Roy en icelle, lever nouveaux extraitz de la refformation des nobles de la parroisse de Maroué, dans l'evesché de Saint-Brieuc, des annees 1446 et 1460 et 1476, dans lesquels Jan le Corgne est employé, et des monstres generalles dudit evesché de l'annee 1479, dans laquelle Jan et Martin le Corgne sont desnommes⁴, dans quinzaine, pour le tout communiqué au Procureur General du Roy et raporté en ladite Chambre, estre ordonné ce qu'il apartiendra.

Seconde induction desditz le Corgne, deffendeurs, sur le seing dudict Philipes et dudict de Cargree, son procureur, fournye et signiffiee au Procureur General du Roy par du Tac, huissier, le 8^e may 1669.

Autre extrait tiré de ladite Chambre des Comptes, des refformations des nobles desdites annees 1446, 1460 et 1476, dans lesquelles lesdits Jan et Guillaume le Corgne sont marques au rang desdits nobles ; ledict extrait datté au dellivrement du 16^e avril 1669.

Les autres actes et pieces mantionnes dans ladite induction.

Et tout ce que par lesdits le Corgne a esté mis et induict, conclusions du Procureur General du Roy, considéré.

La Chambre, faisant droit sur l'instance et execution d'arrest, a déclaré et declare lesditz Philipes, René, Jullien, Gilles et François le Corgne et leurs dessandans en mariage legitime nobles, issus d'antienne extraction noble, et comme tels leur a permis, et à leurs dessandans en mariage legitime, de prendre la qualitté d'escuyer, et les a maintenus au droit d'avoir armes et escussions timbres appartenants à leurs qualitté et à jouir de tous droitz, franchises, privileges et preminances attribues aux nobles de la province, et ordonné que leurs noms seront employes au roolle et cathologie d'iceux de la seneschaussee de Rennes.

Faict en ladite Chambre, à Rennes, le 15^e jour de juin 1669.

Signé : MALESCOT.

(Copie ancienne. – Bib. Nat. – Cabinet des titres. Carré de d'Hozier, vol. 202.)

3 Il faut lire Boullain. NdT : c'est bien Poullain et non Boullain.

4 NdT : la montre du 8 janvier 1480 nouveau style donne bien Jean, mais avec Guillaume et non Martin.

Induction

Induction d'actes et pieces que fait en la Chambre, devant vous Nosseigneurs les commissaires establies par le Roy pour la reformation de la Noblesse de ce pays et duché de Bretagne, escuyer Phelipes le Corgne, sieur de Launay, pour luy et pour escuyers René le Corgne, sieur de la Noehaslé, Jullien le Corgne, sieur du Bois, Gilles le Corgne, sieur de la Villemorhen, et François-Claude le Corgne, ses freres juveigneurs, deffendeur, contre M. le Procureur General du Roy, demandeur.

A ce que, s'il plait à la chambre, faisant droit sur l'instance, le deffendeur et sesdictz juveigneurs et leurs dessandants en legitime mariage soient maintenus en la qualité de nobles et d'escuyers, comme isseus d'ancienne extraction noble, et comme tels leur soit permis de prendre laditte qualité de nobles et d'escuyers, prise par eux et leurs predecesseurs, et maintenus d'avoir armes et escussions timbres appartenantz à leur dicte qualité, sçavoir : *D'azur au lion leopardé d'or, chargé de deux fleurdelis de mesme, l'unne sur la teste et l'autre sur la queue*, et à jouir de tous droictz, franchises, preminences et privileges attribues aux nobles de cette province, et ordonné que leurs noms seront employes et inceres aux rolle et cathalogue de la senechaussé de Rennes.

Pour ausquelles fins parvenir, le deffendeur fait la presante induction de ses actes, suivant l'ordonnance du Roy, arest et reglement de la Chambre, et sa declaration et de sesdictz puisnes, faite au Greffe de ladite Chambre, le 17^e octobre 1668, de vouloir, soubs le bon plaisir de Sa Majesté et de Nosseigneurs les commissaires de laditte Chambre, soustenir laditte qualité de nobles et descuyers, comme isseus d'ancienne extraction noble, et d'avoir pour armes : *D'azur au lion leopardé d'or, chargé de deux fleurdelis de mesme, l'unne sur la teste, l'autre sur la queue*, comme ont eu de tout temps immemorial ses predecesseurs seigneurs de la Villegouranton et de Launay le Corgne, en la paroisse de Maroué, evesché de Saint-Brieuc.

Et pour faire conster de la presentation faite au Greffe de laditte Chambre par ledit deffendeur et sesdictz puisnes et de leursdites armes trimbres :

Induict le deffendeur saditte declaration par luy et sesdictz puisnes faite au Greffe de laditte Chambre, ledit jour 17^e octobre 1668, signé : J. le Clavier, avec un blason desdittes armes, contenu en un feillet de parchemin, et un memoire de genealogie y attachee. Le tout chiffré et cotté en marge ...A.

Ledit deffendeur est le fils aîné et heritier principal et noble de deffunct autre escuyer Phelipes le Corgne, sieur de la Noehaslé, son pere, et attendant de damoizelle Sebastienne Jollan, sa mere, et a pour freres puisnes lesdictz escuyers René, Jullien, Gilles et François-Claude le Corgne, pour lesquels, comme leur aîné noble, en consequence de leurditte declaration par eux faite au Greffe de la Chambre et pour luy-mesme, en son privé nom, il fait la presante induction ; ledict feu escuyer Phelippes le Corgne, sieur de la Noehaslé, pere du deffendeur et de sesdictz jouveigneurs, estoit fils puisné d'escuyer Gilles le Corgne et de damoizelle Gillette de Queauguen, vivantz sieur et dame de Launay, et avoit pour frere aîné escuyer Jan le Corgne, sieur dudit lieu de Launay, heritier principal et noble desdictz pere et mere communs, lequel est debede sans hoirs de corps ; ledict Gilles le Corgne, escuyer, sieur de Launay, pere dudit feu sieur de la Noehaslé et ayeul du deffendeur, estoit fils aîné et heritier principal et noble de deffunct escuyer Jehan le Corgne et de damoizelle Jacqueline de Lesmeleuc, sieur et dame dudict lieu de Launay, bisayeuls du deffendeur ; ledict Jehan le Corgne estoit fils aîné et heritier principal et noble d'escuyer Rolland le Corgne et de damoizelle Catherine Boulain⁵, sieur et dame dudict lieu de Launay, tris ayeuls du deffendeur ; ledict Rolland le Corgne estoit fils puisné d'escuyer Jehan le Corgne⁶ et de damoiselle Tualle de

5 NdT : pour *Poullain*.

6 NdT : Cette filiation est fausse, Rolland n'était pas fils de Jean Le Corgne, mais fils de Mathelin comme clairement indiqué à la réformation du 21 septembre 1510 à Maroué qui mentionne, de plus, que la maison de Launay en Maroué était non noble. Rolland et Jean étaient par contre très certainement parents.

Cargouet, sieur et dame de la Villegouranton, quatriesme ayeulz du deffendeur ; tous lesquels sieurs de Launay et de la Villegouranton se sont toujours gouvernes et comportes noblement.

Et pour en commenser la preuve par le deffendeur, il est fils aîné et heritier principal et noble de deffunct autre escuyer Phelipes le Corgne, sieur de la Noehaslé, et de damoizelle Sebastienne Jollain, et a espousé en premiere nopces feu damoizelle Marguerite Hersart, feille aisnee d'escuyer François Hersart et de damoizelle Janne de Chasteaubriand, sieur et dame de la Villemarqué, dont il a son fils aîné, appelé Louis le Corgne, et en son second mariage ledit deffendeur a espousé damoizelle Suzaine Couriolle, feille de noble gentz Ollivier Couriolle et de Louise le Moine, sieur et dame de la Houssaye, dont il a deux fils. Et pour justifier ce que dessus :

Induict le deffendeur ses contractz de mariage avec lesdittes Hersart et Couriolle, dattes des 10^e novembre 1660 et 30^e decembre 1664, ensemble attaches, chiffres en marge et cottes ...B.

Pour justifier que le deffendeur est le fils aîné et heritier principal et noble d'autre escuyer Phelipes le Corgne, sieur de la Noehaslé, et attendant que damoizelle Sebastienne Jollain, ses pere et mere, et qu'il a pour freres puisnes lesdictz René, Jullien, Gilles et François-Claude le Corgne :

Induict le deffendeur le contrat de mariage d'entre sesdictz pere et mere, datté du 8^e aoust 1629, signé : Verger, nottaire, avec cinq extraictz de papier baptismaux des paroisses de Notre-Dame de Redon, de Cousmieux, evesché de Dol, et de Saint-Martin de Lamballe, dattes au collationnes des 11^e et 19^e novembre et 30^e decembre 1668 et 3^e janvier 1669, signes : Mansel, F. Collas et Breal, recteurs, Charles Lanzart, Rouxignay et Perret, et le prisage de la succession noble dudit feu sieur de la Noehaslé, leur pere commun, fait entre parties par priseurs nobles et cordeurs convenus respectivement, apres partage jugé en la juridiction de Lamballe, par exploit y referé, datté du 9^e novembre 1666, ledict partage prisage datté du 11^e novembre suivant, signé de Drouet.

Lesdittes pieces estantes au nombre de sept, ensemble attaches, chiffres en marge et cottes ...C.

Ledict feu Phelipes le Corgne, escuyer sieur de la Noehaslé, pere du deffendeur, estoit fils puisné, comme il a esté dit, de deffunct escuyer Gilles le Corgne et de damoiselle Gillette de Queauguen, vivantz sieur et dame de Launay, et avoit pour frere aîné, heritier principal et noble de pere et mere communs, escuyer Jan le Corgne, sieur dudit lieu de Launay, lequel apres avoir esté marié deux fois, sçavoir à damoizelle Bertranne de la Doubrye en premieres nopces, et en second mariage à damoizelle Pezronnelle Urvoy, soeur d'escuyer Gilles Urvoy, sieur de Saint-Gles⁷, senechal de Lamballe, estant neanmoins debcedé sans hoirs de corps, auroit relaissé, en 1653, sa succession collaterale noble audit sieur de la Noehaslé, son frere et heritier collateral, principal et noble, ayant au partable et mobilier de laditte succession pour coheritier les enfantz de deffuncte damoizelle Helaine le Corgne et d'escuyer Pierre du Bohu, sieur et dame du Bourne, ses nepveux, isseus de sa soeur, laquelle avoit esté partagee aux successions desdictz pere et mere communs par ledit Jan le Corgne, aîné, des le 14^e febvrier 1641, lequel partage la Chambre est suplié de remarquer avoir esté fait apres communication du grand bien et des actes et titres en justifiens la qualité, quy est recogeu noble et les biens et personnes de gouvernement noble et l'estre toujours ainsi traictes et gouvernes, avec partage avantageux à l'aîné, des auparavant les cent ans derniers, ce sont les propres termes du partage, et pour justifier ce dessus :

Induict le deffendeur l'assiette de partage donné audit sieur de la Noehaslé, son pere, par ledit Jan le Corgne, aîné, aux successions tant escheues dudit Gilles le Corgne, que lors encore à eschoir de laditte de Queauguen, leur pere et mere, datté du dernier juin 1625 et signé : Louis Chapelain, nottaire, avec le partage baillé aux mesmes successions, par ledit Jan le Corgne, à ladite Helaine le Corgne, sa soeur, datté du 14^e febvrier 1641, signé : Genty, nottaire, et l'exploit judiciaire rendu à Lamballe, le 31^e juillet 1653, portant la declaration dudit feu sieur de la Noehaslé de se porter heritier collateral, principal et noble dudit Jan le Corgne, sieur de Launay, son frere aîné, debcedé sans hoirs de corps, signé : Couriolle, greffier. Lesdites trois pieces ensemble attaches et chiffres en marge et cottes ...D.

Ledict escuyer Gilles le Corgne, sieur de Launay, estoit fils aîné et heritier principal et noble

7 Saint-Glen.

de deffunct escuyer Jehan le Corgne et de damoizelle Jacquette de Lesmeleuc, vivantz sieur et dame de Launay, laquelle de Lesmeleuc estoit damoizelle d'extraction feille d'escuyer Henry de Lesmeleuc et de damoizelle Catherine Bertho. Ledict Gilles le Corgne, escuyer, avoit espousé laditte Gillette de Queauguen, quy estoit pareillement damoizelle d'extraction, feille de nobles homs Raoul de Queauguen et de dame Françoise Jocet, sieur et dame de la Motte-Gouranton, la Villesalmon, les Tronchays et la Villedelays ; et en son temps ledit Gilles le Corgne a toujours esté considéré comme gentilhomme d'extraction, en faveur de quoy et de ce qu'il a porté les armes pour le service de Sa Majesté, il a eu sauvegarde en sa maison durant les troubles et guerres civiles arives de son vivant. Et pour justifier ce que desus :

Induict le deffendeur un acte du 27^e octobre 1558, portant un advancement de droit successiff de trante livres monnois rente, faite par ledit Jehan le Corgne, sieur de Launay, tant en son privé non que comme pere et garde naturel de Gilles le Corgne, à damoizelle Marie le Corgne, sa feille, et à Gilles Gouiquet, son mari, ledit advancement de droit successiff déclaré à laditte Marye le Corgne pour luy estre precompté au partage des successions echeue de laditte de Lesmeleuc et à echoir dudit Jehan le Corgne, quy sont appures nobles, et ledit Gilles le Corgne est déclaré heritier principal et noble, ledit acte signé : Fournier et Gouiquet, avec unne declaration fournie au Roy par ledit Gilles le Corgne, de ses biens nobles, en 1573, signé au receu, de Sauvagere, et quatre lettres de sauvegardes dellivres audit Gilles le Corgne, de la part des seigneurs compte de Brisac et d'Aumont, mareschaux de France, et du sieur de la Tramblays, mestre de camp soubs le seigneur prince de Dombes, dattees des 17^e aoust 1590, dernier may 1597, 17^e fevrier 1598 et 30^e may 1595, signes et garanties, l'unne desquelles est dellivré par ledit mareschal d'Aumont audit Gilles le Corgne, sieur de Launay, en faveur de ce qu'il estoit gentilhomme portant les armes, comme il est escript, soubs le signe dudit d'Aumont ; plus unne transaction faite entre ledit Raoult de Queauguen, pere et garde naturel de laditte Gillette de Queauguen et autres ses enfentz, et escuyer François Labé, sieur de la Motte, fils aîné et heritier principal et noble de laditte Françoise Jocet, datté du 9^e may 1587, signé : Poulain et Haugommar, et unne sentence obtenue en la juridiction de Moncontour, de la part desdictz Gilles le Corgne et Gillette de Queauguen, contre escuyer Jan de Queauguen, sieur des Tronchays, fils aîné et heritier principal et noble dudit Raoult de Queauguen, touchant la succession, du 4^e aoust 1606, signé et guaranty. Lesdites pieces estantes au nombre de huit, ensemble attaches, chiffres en marge et cottes ...E.

Ledict escuyer Jehan le Corgne, sieur de Launay, bisayeul du deffendeur, demeura fils aîné et heritier principal et noble de deffunct nobles gens Rolland le Corgne et Catherine Boulain, trisayeulz du deffendeur, et eust pour frere puisné, noble et discret missire François le Corgne, comme conste par le partage donné audit missire François le Corgne par ledict Jehan le Corgne, sieur de Launay, son frere aîné, heritier principal et noble, ausdites successions de Rolland le Corgne et Catherine Boulain, pere et mere communs, lesquelles successions estoient escheues avant 1533, et consequament avant la reformation de la Coustume, faite en 1539, ainsy que ce justifie par transaction faite le 13^e may 1533 entre ledit noble homme Jehan le Corgne, sieur de Launay, fils aîné et heritier principal et noble dudit feu Rolland le Corgne, et noble homme Jehan le Corgne, sieur de la Fresnay, quy fait voir que ledict Rolland le Corgne estoit debcede avant l'an 1533, et pour justifier ce que desus :

Induict le deffendeur ledit partage donné audit missire François le Corgne le 11^e septembre 1555, signé : Morin et Halna, avec ladite transaction du 13^e may 1533, signé : B. Lapie, passe.

Lesdites deux pieces ensemble attaches, chiffres en marge et cottes ...F.

Ledict Rolland le Corgne, tris ayeul du deffendeur, estoit fils puisné de nobles gentz Jehan le Corgne et Tualle de Cargouet, sieur et dame de la Villegouranton, et avoit pour frere aîné escuyer Guillaume le Corgne, sieur dudit lieu de la Villegouranton. Comme personne noble, ledit Jehan le Corgne⁸, peu avant son debces, a contribué et ledit Jehan le Corgne, son fils, avec les autres nobles de la province, au payement de la renson du roy François I^{er}, levee en 1530 sur les gentz de la

8 NdT : "ledit Jehan" est en fait Roland cité avec son fils Jean dans l'acte de 1530 ci-dessous. Cette erreur est volontaire et tent à rapprocher Roland, père de Jean, avec Guillaume, fils d'autre Jean.

noblesse seulement, et pour justifier ce que dessus :

Induict le deffendeur l'acquit de la contribution faicte par lesdictz Roland et Jehan le Corgne, son fils, au payement de laditte renson de François I^{er}, datté du 18^e juin 1530, signé : G. Chouart, avec une transaction du 27^e octobre 1505, faicte entre ledit Rolland le Corgne et Jehan de Queauguen, portant le desistement de l'opposition qu'avoit formé ledit le Corgne à l'acquest faict par ledit de Queauguen dudit lieu de la Villegouranton, quy est declaré avoir apartenu ausdictz Jehan le Corgne et Tualle de Cargouet, et dont ledit Guillaume de Corgne est declaré avoir esté fils aîné et heritier prince et noble, et ledit Rolland le Corgne fils puisné et heritier en sa portion⁹, laditte transaction signé : Maupetit, passe, et Guillaume Leon, passe. Lesdites deux pieces ensemble attaches, chiffres en marge et cottes ...G.

Ledit Jehan le Corgne, sieur de la Villegouranton, pere dudit Rolland, quatriesme ayeul du deffendeur, est marcqué au rang des nobles de la paroisse de Maroué aux reformations de 1476, 1460 et 1446, et saditte maison de la Villegouranton, noble, en laditte reformation de 1476, et pour justifier :

Induict le deffendeur deux extraictz desdites reformations par luy tires de la Chambre des Comptes de cette province, dattes aux arestz de laditte Chambre, quy en ordonnent la delivrance, des 20^e novembre 1668 et 14^e febvrier 1669, signes et garanties et chiffres en marge et cottes ...H.

La Chambre est supplyé dobserver que la qualité noble dudit Jehan le Corgne, sieur de la Villegouranton, estante prouvé, comme elle l'est, par lesdites reformations de 1476, 1460 et 1446, on ne peult, sauff correction, revoquer en doute celle du deffendeur et de sesdictz puisnes, puis qu'il faict voir clairement, par les actes cottes en la presante induction, tous ses predecesseurs, depuis ledit an 1446, s'estre gouvernes noblement et avoir toujours pris la qualite de nobles et d'escuyers ou d'heritiers principaulx et nobles, ce que le deffendeur pouroit prouver par plusieurs autres actes et titres, sans qu'apres le debces dudit Jehan le Corgne, escuyer, sieur de Launay, son oncle, frere aîné dudit sieur de la Noehaslé, son pere, les titres et garandz et meubles de sa maison ont este peilles et divertis par damoizelle Pezronnelle Urvoy, veufve de sondict oncle, vers les heritiers de laquelle et d'escuyer Gilles Urvoy, sieur de Saint-Glé¹⁰, son frere, quy en sont demeures saizis et sont refusantz de les rendre, ledit deffendeur proteste de ce pourvoir tant en reprise de proces contr'eux intenté par ledit feu sieur de la Noehaslé, son pere, et pendant en la Cour, qu'autrement, et en consequence de ce que desus, outre et par sus lesdittes protestations, persiste le deffendeur à ses precedantes fins et conclusions.

Signé : PH. LE CORGNE
A. DECARGNÉ

Le 18^e febvrier 1669, signifié copie à M. le Procureur General du Roy, parlant à son secretaire, en son hostel, à Rennes.

(Original. - Archives du Château de Bonabry, en Hillion.)



9 NdT : Le passage "fils puisné et heritier en sa portion" est faux et c'est une erreur volontaire, cf. ci-dessus.

10 Saint-Glen.